

ALJOŠA ČAMPARA
delegat u Domu naroda Parlamenta Federacije Bosne i Hercegovine

Sarajevo, 23.7.2019. godine

**PARLAMENT FEDERACIJE
BOSNE I HERCEGOVINE
DOM NARODA**
n/r gđin Tomislav Martinović, predsjedavajući

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 23-07-2019			
Org. jed.	Broj	Priloga	Vrijednost
02	02	1469	19

x 8

U skladu sa članom 155. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br 27/03 i 21/09) dostavljam Vam, radi razmatranja i prihvatanja, **Nacrt Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom.**

NAPOMENA: Budući da se radi o Nacrtu zakona koji je identičan Nacrtu zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom kojeg je predložio Irfan Čengić, poslanik u Predstavničkom domu Parlamenta Federacije Bosne i Hercegovine, a kojeg je Predstavnički dom prihvatio na 1. sjednici od 28.2.2019. godine, također Vam dostavljam Obavijest Predstavničkog doma o prihvatanju Nacrta ovog zakona kao i Mišljenje Vlade Federacije o Nacrtu ovog zakona.

S poštovanjem,

DELEGAT

Aljoša Čampara



NACRT

**ZAKONA O IZMJENAMA I DOPUNAMA ZAKONA O OSNOVAMA SOCIJALNE
ZAŠTITE, ZAŠTITE CIVILNIH ŽRTAVA RATA I ZAŠTITE PORODICE SA
DJECOM.**

ZAKON
O IZMJENAMA I DOPUNAMA ZAKONA O OSNOVAMA SOCIJALNE ZAŠTITE,
CIVILNIH ŽRTAVA RATA I ZAŠTITE PORODICA SA DJECOM.

Član 1.

U Zakonu o osnovama socijalne zaštite, civilnih žrtava rata, i zaštiti porodica sa djecom („Službene novine Federacije BiH“, broj: 36/99) u članu 19. iza stava 6. dodaje se tačka 7. koji glasi:

„7) status roditelja njegovatelja ili status njegovatelja“

Član 2.

Nakon člana 47. Zakona o osnovama socijalne zaštite, civilnih žrtava rata, i zaštiti porodica sa djecom („Službene novine Federacije BiH“, broj: 36/99) dodaje se odjeljak g) koji sadrži članove 47a., 47b., 47c., 47d., 47e., 47f., 47g., 47h. 47i. koji glase:

„g) STATUS RODITELJA NJEGOVATELJA ILI STATUS NJEGOVATELJA

Član 47a.

(1) Pravo na status roditelja njegovatelja priznaje se jednom od roditelja djeteta s poteškoćama u razvoju ili osobe s invaliditetom koje ispunjava jedan od sljedećih uvjeta:

- potpuno je ovisno o pomoći i njezi druge osobe jer mu je zbog održavanja života potrebno pružanje specifične njege izvođenjem medicinsko-tehničkih zahvata za koju je prema preporuci liječnika roditelj osposobljen,
- u potpunosti je nepokretno i uz pomoć ortopedskih pomagala,
- ima više vrsta teških oštećenja (tjelesnih, mentalnih, intelektualnih ili osjetilnih), zbog kojih je potpuno ovisno o pomoći i njezi druge osobe pri zadovoljavanju osnovnih životnih potreba.

(2) Ako u obitelji ima dvoje ili više djece s poteškoćama u razvoju, odnosno osoba s invaliditetom iz stava 1. ovoga člana, status roditelja njegovatelja mogu steći oba roditelja.

Član 47b.

(1) Iznimno, kada su roditelji djeteta s poteškoćama u razvoju umrli ili nijedan od roditelja ne živi s djetetom i o njemu se ne brine, ili živi s djetetom ali nije u mogućnosti pružiti mu potrebnu njegu zbog svog psiho-fizičkog stanja, status njegovatelja može se priznati jednom od članova porodice s kojim živi u porodičnoj zajednici.

(2) Pravo na status roditelja njegovatelja, umjesto roditelju, može se priznati i bračnom ili izvanbračnom drugu roditelja djeteta s poteškoćama u razvoju ili osobe s invaliditetom iz člana 47a. ovoga Zakona s kojim živi u porodičnoj zajednici.

(3) Ako u jednoroditeljskoj porodici ima dvoje ili više djece s poteškoćama u razvoju, odnosno osoba s invaliditetom, status roditelja njegovatelja iz člana 47a. ovoga Zakona može se priznati, osim roditelja, i jednom od članova obitelji s kojim živi u porodičnoj zajednici.

Član 47c.

(1) Status roditelja njegovatelja ili njegovatelja ne može se priznati roditelju ili drugoj osobi iz članova 47a. i 47b. ovoga Zakona ako je djetetu s poteškoćama u razvoju ili osobi s invaliditetom osigurana usluga smještaja, organiziranog stanovanja, poludnevnog ili cjelodnevnog boravka u skladu s ovim Zakonom.

(2) Roditelju ili drugoj osobi iz članova 47a. i 47b. ovoga Zakona priznaje se pravo na status roditelja njegovatelja kada dijete s poteškoćama u razvoju, odnosno osoba s invaliditetom boravi manje od četiri sata dnevno u predškolskoj, obrazovnoj ili zdravstvenoj ustanovi, domu socijalne skrbi ili kod drugog pružatelja usluga boravka.

(3) Iznimno od stava 2. ovoga člana, roditelju ili drugoj osobi iz stava 1. ovoga člana priznaje se pravo na status roditelja njegovatelja ili njegovatelja kada dijete s poteškoćama u razvoju, odnosno osoba s invaliditetom u predškolskoj, obrazovnoj ili zdravstvenoj ustanovi, domu socijalne skrbi, centru za pružanje usluga u zajednici ili kod drugog pružatelja usluga boravka boravi četiri i više sati dnevno ako mu roditelj ili njegovatelj tijekom boravka pruža usluge pomoći i njege.

Član 47d.

Pravo iz člana 47a. ovoga Zakona može se priznati roditelju njegovatelju do navršene 65 godine života, a duže ako se pružanje pomoći i njege ne može osigurati putem osoba iz člana 47b. ovoga Zakona.

Član 47e.

(1) Roditelj njegovatelj odnosno njegovatelj ima pravo na naknadu čiju osnovicu određuje Vlada FBiH, prava iz penzionog osiguranja, zdravstvenog osiguranja i prava za vrijeme nezaposlenosti, kao zaposlena osoba prema posebnim propisima.

(2) Ministarstvo putem kantonalnih centara za socijalni rad vrši obračun i isplatu naknade iz stava 1. ovoga člana i uplaćuje sve doprinose za obavezna osiguranja, a sredstva za te namjene se osiguravaju u federalnom budžetu.

(3) Osnovica za uplatu doprinosa je najniža mjesečna osnovica za obračun doprinosa za obavezna osiguranja za tekuću godinu.

(4) Ministarstvo vodi evidenciju osoba kojima je priznato pravo na status roditelja njegovatelja ili njegovateljja.

(5) Ministar nadležan za poslove socijalne zaštite pravilnikom propisuje sadržaj i način vođenja evidencije iz stava 4. ovoga člana.

Član 47f.

(1) Roditelj njegovatelj, odnosno njegovatelj ima pravo na naknadu i za vrijeme privremene nesposobnosti za pružanje njege zbog bolesti, kao i tokom odmora, kada ne obavlja poslove njegovateljja, te ako je dijete na bolničkom liječenju najduže dva mjeseca.

(2) Roditelj njegovatelj, odnosno njegovatelj može koristiti odmor u trajanju do četiri sedmice tokom godine.

Član 47g.

Rješenje o priznavanju prava na status roditelja njegovateljja ili njegovateljja donose kantonalni centri za socijalni rad uz saglasnost Ministarstva.

Član 47h.

Pravo na status roditelja njegovateljja ili njegovateljja prestaje:

- na zahtjev roditelja njegovateljja ili njegovateljja,
- ako roditelj njegovatelj ili njegovatelj nije u mogućnosti pružati potrebnu njegu zbog svog psiho-fizičkoga stanja,

- ako roditelj njegovatelj ili njegovatelj zbog neopravdanih razloga ne obavlja poslove njegovatelja,
- ako se roditelj njegovatelj ili njegovatelj nalazi u pritvoru, odnosno istražnom zatvoru ili na izdržavanju kazne zatvora u trajanju dužem od dva mjeseca,
- kada roditelj njegovatelj ili njegovatelj navrší 65 godina života, osim u slučaju iz člana 47d. ovoga Zakona
- smrću djeteta s poteškoćama u razvoju ili osobe s invaliditetom, roditelja njegovatelja ili njegovatelja, u slučaju smrti djeteta s poteškoćama u razvoju ili osobe sa invaliditetom roditelj njegovatelj ili njegovatelj imaju pravo na naknadu do 6 mjeseci nakon smrti.

Član 47i.

Vrstu specifične njege uz izvođenje medicinsko-tehničkih zahvata i težinu oštećenja (tjelesnih, mentalnih, intelektualnih ili osjetilnih) iz člana 47a. stava 1. ovoga Zakona, pravilnikom propisuje ministar nadležan za poslove socijalne zaštite."

Član 3.

Ovaj Zakon će se primjenjivati od 01.01.2020.godine.

Član 4.

Ovaj Zakon stupa na snagu narednog dana od dana objavljivanja u "Službenim novinama Federacije BiH".

OBRAZLOŽENJE
ZAKON O IZMJENAMA I DOPUNAMA ZAKONA O OSNOVAMA SOCIJALNE
ZAŠTITE, CIVILNIH ŽRTAVA RATA I ZAŠTITE PORODICA SA DJECOM.

I. USTAVNI OSNOV

Ustavni osnov za donošenje ovog zakona sadržan je u dijelu III Ustava FBiH član 2. tačka e), koji kaže da je federalna vlast i kantoni nadležni za donošenje zakona i propisa iz oblasti socijalne politike.

Parlament Federacije Bosne i Hercegovine je ovlašten za donošenje zakona o obavljanju funkcija federalne vlasti.

II. RAZLOZI ZA DONOŠENJE

Djeca i osobe sa invaliditetom, u razvoju su jedna od najosjetljivijih kategorija stanovništva, te da su njihove porodice u velikoj mjeri izložene brojnim potrebama, podložne raznim rizicima, uveliko oviseći kako o sistemu socijalne zaštite tako i o radu udruženja koja se bave ovom problematikom, smatramo neophodnim sistemski i na sveobuhvatan način riješiti problematiku kada su u pitanju porodice koje imaju člana djetete/osobu sa poteškoćama u razvoju.

Tu prvenstveno smatramo da treba podržati roditelje te sistemski riješiti njihov status, imajući u vidu da su u najvećem broju slučajeva sami roditelji „njegovatelji, stručnjaci, odgajatelji...” svoje djece, gdje im je pri tome oduzeto osnovno pravo, pravo na rad, jer nisu u mogućnosti raditi jer je njihovoj djeci nerijetko neophodna 24satna briga i njega. Po uzoru na zemlje EU, gdje je sistemski tretirano i riješeno pitanje roditelja njegovatelja

Uzor u izradi ovog zakonskog rješenja za Federaciju Bosne i Hercegovine poslužila je Republika Hrvatska koja je upravo na ovakav način regulisala statuse roditelja njegovatelja i njegovatelja.

III. OBRAZLOŽENJE PRAVNIH RJEŠENJA

Odredbom člana 1. je dodana nova tačka u postojeći zakon kojom se uvodi pojam status roditelja njegovatelja ili status njegovatelja u oblasti socijalne zaštite i zaštite porodica sa djecom u Federaciji Bosne i Hercegovine.

Odredbom člana 2. definisan je pojam roditelja njegovatelja ili njegovatelja, ko ima pravo na taj status, prava koja proizlaze iz status, obaveze koje proizilaze i statusa, te način prestanka statusa roditelja njegovatelja ili njegovatelja.

Odredbama člana 2. ovog Zakona u Zakon o osnovama socijalne zaštite, civilnih žrtava rata i zaštiti porodica sa djecom dodaje se 9 novih članova zakona koji regulišu:

Članom 47a. ko ima pravo na status njegovatelja i pod kojim uslovima

Članom 47b. Se reguliše ko osim roditelja može ostvariti status njegovatelja i pod kojim uslovima.

Članom 47c. Se definiše da roditelji djece ili osoba sa invaliditetom koje imaju osigurane usluge smještaja, organiziranog stanovanja, poludnevnog ili cjelodnevnog boravka u skladu s ovim Zakonom ne mogu steći status njegovatelja osim u određenim izuzecima definisanim ovim članom.

Članom 47d. Se definiše da roditelji njegovatelji ovo pravo mogu ostvarivati najkasnije do 65 godine života.

Članom 47e. Se definiše da roditelji njegovatelji ili njegovatelji imaju pravo na mjesečnu nakandu čiju će visinu propisati nadležno federalno ministarstvo.

Također se definiše da roditelji njegovatelji ili njegovatelji imaju pravo na prava iz penzionog osiguranja, zdravstvenog osiguranja i prava za vrijeme nezaposlenosti po minimalnim osnovicama u FBiH za tekuću godinu

Članom 47f. Definiše se pravo roditelja njegovatelja ili njegovatelja na odmor u toku godine.

Članom 47g. Se propisuje ko donosi rješenje o priznavanju statusa roditelja njegovatelja.

Članom 47h. Se propisuje pod kojim uslovima prestaje status roditelja njegovatelja ili njegovatelja.

Članom 47i. Se ostavlja nadležnost i obaveza ministru da donese podzakonske akte.

Odredbom člana 3. definisano je da će se zakon primjenjivati od januara 2020. godine, kako bi se ostavio vremenski period od usvajanja za prilagodbu i donošenje podzakonskih akata.

Odredbom člana 4. definisano je stupanje na snagu zakona.

IV. FINANSIJSKA SREDSTVA

Za provođenje ovog Zakona su potrebna dodatna finansijska sredstva iz budžeta Federacije Bosne i Hercegovine.

Tačnu procjenu potrebnih finansijskih sredstava iz budžeta Federacije Bosne i Hercegovine treba napraviti u toku javne rasprave o ovom zakonu.

Prilikom javne rasprave je ključno ustanoviti okviran broj potencijalnih osoba koje mogu ostvariti pravo na status roditelja njegovatelja ili njegovatelja što mogu uraditi kantonalne službe za socijalni rad.

Financijska sredstva su potrebna za:

- a) Mjesečnu naknadu roditeljima starateljima ili starateljima koju će propisati Vlada FBiH u skladu sa finansijskim mogućnostima
- b) Novac za uplatu penzionog i zdravstvenog osiguranja roditeljima starateljima ili starateljima po minimalnim osnovicama.

Broj: 01-02-97/19
Sarajevo, 08.03.2019.

DOM NARODA PARLAMENTA FEDERACIJE BIH

n/r gospodina Tomislava Martinovića, predsjedavajućeg
n/r gospodina Aljoše Čampare, potpredsjedavajućeg

**PREDMET: NACRT ZAKONA O IZMJENAMA I DOPUNAMA ZAKONA O OSNOVAMA
SOCIJALNE ZAŠTITE, ZAŠTITE CIVILNIH ŽRTAVA RATA I ZAŠTITE
PORODICE SA DJECOM**

- predlagač Irfan Čengić

Na osnovu člana 198. Poslovnika Predstavničkog doma Parlamenta FBiH, obavještavam Vas da je Predstavnički dom Parlamenta FBiH, na 1. redovnoj sjednici održanoj 28.02.2019. godine razmatrao Nacrt Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom, te usvojio slijedeći


ZAKLJUČAK

1. Predstavnički dom Parlamenta FBiH prihvata Nacrt Zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom, te smatra da može poslužiti kao osnova za izradu Prijedloga zakona.
2. Zadužuje se predlagač da, u saradnji sa nadležnim Ministarstvom, provede javnu raspravu u trajanju od 30 dana.
3. Zadužuje se predlagač da prilikom izrade Prijedloga zakona ima u vidu sve sugestije, primjedbe i prijedloge iznesene u raspravi kao i one koje su dostavljene ili će biti dostavljene u pisanoj formi.

S poštovanjem,

Dostaviti:

- naslovu
- predsjedniku i potpredsjednicima FBiH
- premijeru, zamjenicima premijera
- Vladi FBiH
- Irfanu Čengiću
- Predsjedavajućem PD
- sekretaru Doma naroda
- službi Doma naroda
- sekretaru Predstavničkog doma
- službi Predstavničkog doma
- a.a



PREDSJEDAVAJUĆI

mr.sc. Elvir Karajbić

12-III 13, opr. kuzina 2

BOSNA I HERCEGOVINA
FEDERACIJA BOSNE I HERCEGOVINE
VLADA

БОСНА И ХЕРЦЕГОВИНА
ФЕДЕРАЦИЈА БОСНЕ И ХЕРЦЕГОВИНЕ
ВЛАДА

BOSNIA AND HERZEGOVINA
FEDERATION OF BOSNIA AND HERZEGOVINA
GOVERNMENT

Broj: 03-02-78/2019
Sarajevo, 22.02.2019. godine

PARLAMENT FEDERACIJE
BOSNE I HERCEGOVINE

- Predstavnički / Zastupnički dom - *W*

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO *11:15*

Prilozi: <i>22-02-2019</i>			
Org. jed.	Broj	Priloga	Vrijednost
01	02	97	19


X 10

PREDMET: Mišljenje Vlade Federacije Bosne i Hercegovine

Poštovani,

U skladu s članom IV.B.3.7.c) (III) Ustava Federacije BiH, a u vezi s članom 165. stav (4) Poslovnika Predstavničkog doma Parlamenta Federacije BiH („Službene novine Federacije BiH“, br. 69/07 i 2/08), u prilogu Vam dostavljam **Mišljenje Vlade Federacije Bosne i Hercegovine o Nacrtu zakona o izmjenama i dopunama Zakona o osnovama socijalne zaštite, civilnih žrtava rata i zaštite porodica sa djecom, kojeg je predložio Irfan Čengić, poslanik u Predstavničkom domu Parlamenta Federacije Bosne i Hercegovine**, a koje je Vlada Federacije Bosne i Hercegovine utvrdila na 130. hitnoj sjednici, održanoj 22.02.2019. godine.

S poštovanjem,



PREMIJER

Fadil Novalić

Prilog: kao u tekstu

Federalno ministarstvo rada i socijalne politike
gosp. Vesko Drljača, ministar

Na osnovu člana 51. Poslovnika o radu Vlade Federacije Bosne i Hercegovine - Prečišćeni tekst - („Službene novine Federacije BiH“, br. 6/10, 37/10 i 62/10), a u vezi s članom 165. stav (4) Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07 i 2/08), nakon razmatranja Nacrta zakona o izmjenama i dopunama Zakona o osnovama socijalne zaštite, civilnih žrtava rata i zaštite porodica sa djecom, koji je predložio Irfan Čengić, poslanik u Predstavničkom domu Parlamenta Federacije Bosne i Hercegovine, Vlada Federacije Bosne i Hercegovine je, na 130. hitnoj sjednici, održanoj 22.02.2019. godine, utvrdila sljedeće

MIŠLJENJE

Vlada Federacije Bosne i Hercegovine je mišljenja da ne postoje uslovi za usvajanje Nacrta zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom, koji je predložio Irfan Čengić, poslanik u Predstavničkom domu Parlamenta Federacije Bosne i Hercegovine, u cilju uvođenja prava na „priznavanje statusa roditelja njegovatelja ili status njegovatelja“ za lica s invaliditetom koja ispunjavaju jedan od uslova definiranih Nacrtom.

OBRAZLOŽENJE

Nacrt zakona o izmjenama i dopunama Zakona o osnovama socijalne zaštite, civilnih žrtava rata i zaštite porodica sa djecom odnosi se na uvođenje novog prava kroz sistem socijalne zaštite u Federaciji Bosne i Hercegovine i to prava na „priznavanje statusa roditelja njegovatelja ili status njegovatelja“ za lica s invaliditetom koja ispunjavaju jedan od uslova definiranih Nacrtom.

Prema dostavljenom Nacrtu zakona o izmjenama i dopunama navedenog Zakona, roditelj njegovatelj imao bi pravo na naknadu čiju osnovicu bi određivala Vlada Federacije Bosne i Hercegovine, prava iz penzionog osiguranja, zdravstvenog osiguranja i prava za vrijeme nezaposlenosti, kao zaposleno lice prema posebnim propisima, a sredstva za naknadu osiguravala bi se u federalnom budžetu.

Svrha uvođenja naknade po osnovu priznavanja statusa roditelja njegovatelja je da se sistemski riješi status roditelja koji su njegovatelji, stručnjaci, odgajatelji svoje djece koja su lica s invaliditetom, gdje im je pri tome oduzeto osnovno pravo, pravo na rad zbog neophodne 24 satne brige i njege.

Analizirajući dostavljeni Nacrt zaključujemo da isti nije pripremljen u skladu s Uredbom Vlade Federacije Bosne i Hercegovine o postupku procjene uticaja propisa („Službene novine Federacije BiH“, broj: 55/14). Zbog navedenog nisu obezbjeđeni uslovi za izradu kvalitetnijeg propisa kroz identifikovanje problema, uzroka, ciljnih grupa, te razloga zbog kojih problem nije mogao biti riješen postojećim regulatornim okvirom ili primjenom nenormativnog rješenja kako je to regulisano Uredbom o postupku procjene uticaja propisa.

Takođe, kroz propis nisu vidljive kategorije i broj lica koja bi bila obuhvaćena pravom, potrebna finansijska sredstva, način na koji bi se ista obezbijedila i dr.

U obrazloženju Nacrta u pogledu finansijskih sredstava navedeno je da su za provođenje Zakona potrebna finansijska sredstva iz Budžeta Federacije Bosne i Hercegovine, a tačnu procjenu

potrebnih finansijskih sredstava treba napraviti u toku javne rasprave o ovom zakonu. Napominjemo da je izrada finansijske procjene koštanja zakona zahtjevna i kompleksna procedura koja se treba izraditi prije javne rasprave i biti predmet same javne rasprave. S tim u vezi razmotren je predmetni Nacrt zakona, te je ocjenjeno da ne postoje pretpostavke za provođenje javne rasprave obzirom da nisu ispunjeni gore navedeni uslovi.

U konkretnom slučaju neophodno je uraditi detaljnu procjenu broja lica koja bi ostvarivala pravo na „priznavanje statusa roditelja njegovatelja ili status njegovatelja“ za lica s invaliditetom koja ispunjavaju jedan od uslova definiranih Nacrtom. Takođe, neophodno je zajedno s Federalnim ministarstvom zdravstva odrediti koja zdravstvena stanja lica s invaliditetom su uslov za ostvarivanje ovog prava. Potom je neophodno s Federalnim ministarstvom finansija iznaći mogućnost izvora finansiranja prava.

U Federaciji Bosne i Hercegovine pravo na dodatak za njegu i pomoć drugog lica trenutno ostvaruje cca 3.560 djece, a u SOTAC bazi podataka do sada je evidentirano ukupno 34.900 korisnika dodatka za njegu i pomoć drugog lica. Za pretpostaviti je da su sva ova lica, odnosno njihovi članovi domaćinstva (porodice) potencijalni njegovatelji, za koje će biti potrebno isplatiti minimalne mjesečne novčane naknade, uključujući dodatno i sve propisane poreze i doprinose.

U ovom slučaju, licima s invaliditetom, za koje je drugo lice steklo status njegovatelja, bit će neophodno utvrditi prestanak prava na dodatak za njegu i pomoć drugog lica, obzirom da se radi o pravima koja su u suprotnosti jedno s drugim, a što će dalje, također, uzrokovati dodatne troškove prvostepenim organima, te moguće žalbe na rješenja o prestanku ovog prava.

Prihvatanjem ovakvog rješenja za očekivati je da će isto proizvesti potrebu uvođenja ovog statusa i za kategoriju ratnih vojnih invalida, što će dodatno dovesti do ogromnog povećanja budžetskih rashoda, pri čemu bi uvođenje ovog prava samo za jednu kategoriju lica s invaliditetom bilo krajnje diskriminatorno. Naime, ukoliko se isto pravo ne obezbijedi i ovoj populaciji, svakako postoji mogućnost suočavanja s nizom novih tužbenih zahtjeva i sudskih troškova zbog diskriminacije.

Osim navedenog, već duže vrijeme se planira i donošenje četiri posebna propisa koji proizilaze iz važećeg Zakona o osnovama socijalne zaštite, zaštite civilnih žrtava rata i zaštite porodice sa djecom („Službene novine Federacije BiH“, br. 36/99, 54/04, 39/06, 14/09, 45/16 i 40/18), pri čemu se predložene izmjene u ovom trenutku teško mogu smatrati svrsishodnim, posebno ukoliko se ima u vidu da je predmetni propis izmijenjen i dopunjen šest puta, te bi dodatne izmjene u svakom slučaju obuhvatale više od 40% njegovog osnovnog teksta, a što je u suprotnosti s Pravilima i postupcima za izradu zakona i drugih propisa u Federaciji Bosne i Hercegovine („Službene novine Federacije BiH“, broj: 71/14).

Također, Nacrt zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom trebalo bi uskladiti s važećim propisima iz oblasti zapošljavanja, posebno odredbu člana 47e. po pitanju prava na naknadu za vrijeme nezaposlenosti. Naime, smatramo da navedeno pravo može biti uređeno isključivo u skladu sa Zakonom o posredovanju u zapošljavanju i socijalnoj sigurnosti nezaposlenih osoba („Službene novine Federacije BiH“, br. 55/00, 41/01, 22/05 i 9/08).

Shodno navedenom, a nakon što smo razmotrili dostavljeni Nacrt zakona o izmjenama i dopunama Zakona o osnovama socijalne zaštite, zaštite civilnih žrtava rata i zaštite porodice sa djecom, mišljenja smo da ne postoje uslovi za usvajanje istog.

V. broj: 158 /2019
22.02.2019. godine
Sarajevo



PREMIJER
Fadil Novalić
Fadil Novalić